

大毘婆沙論

四十一
四十七

C40
4514
147

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8



C40-4514

了翁上座諱不覺及有
家書置武州普寧山
戒微英塔院庭府中永
春學考殿許出院內
當山三世鐵牛機謹誌



B 64853

阿毗達磨大毗婆沙論卷第一百四十一

五百大阿羅漢等造

唐三藏法師玄奘奉詔譯

大種蘊第五中執受納息第四之五

四念住者一身念住二受念住三心念住四法念住
然此念住總說惟一謂心所中一慧自性根中慧根
力中慧力覺支中擇法覺支道支中正見或分爲二
謂有漏無漏或分爲三謂下中上或分爲四謂三界
繫及不繫或分爲五謂三界繫及學無學乃至若以
相續剎那差別分別則有無量問世尊何故於此義

論

阿毗達磨大毗婆沙論卷第一百四十一

惟

中開少合多惟說四種答佛依正慧行相所緣麤細
不同建立四種問若爾何故契經中說觀內外俱十
二種別答不過四故但說四種如七葉樹七生預流
彼亦如是問此體是慧何故世尊說爲念住答慧由
念力得住所緣故名念住或此慧力令念住境故名
念住此二於境展轉相資勝於餘法故說念住廣辯
念住如餘處說四正斷者一於已生惡不善法爲令
斷故生欲發勤攝心持心二於未生惡不善法爲不
生故餘說如前三於未生善法爲令生故餘說如前
四於已生善法爲令安住不忘倍修增廣故餘說如

前然此正斷或總爲一謂心所中一精進體根中精
進根力中精進力覺支中精進覺支道支中正精進
或分爲二謂有漏無漏或分爲三謂下中上或分爲
四謂三界繫及不繫或分爲五謂三界繫及學無學
乃至若以相續剎那差別分別則有無量問世尊何
故於此義中開少合多惟說四種答一精進體於剎
那中作用不同建立四種謂於已生未生惡法斷及
不生故復於未生已生善法生及增廣故如燈一念
四用差別謂燒炷盡油熱器破闇彼亦如是問法蘊
等論說斷已生惡不善法卽具四種謂於已生惡不

善法爲令斷故生欲發勤攝持心者彼斷已生惡不
善位亦能令彼惡不善法未生不生復令善法未生
得生已生住等乃至說修已生善法令安住等亦具
有四謂於已生善法爲令安住不忘倍修增廣故生
欲發勤攝持心者彼修已生諸善法位亦能令彼惡
不善法已生者斷未生不生復令善法未生者生如
是侵成十六正斷何故於此但說四耶答依修行者
差別意樂至加行位故作是說謂彼先時起一意樂
至加行位便具四種如是依彼四種意樂至加行位
故作是說然加行時皆惟有四不過四故但說四種

如由意樂加行故說如是由趣入加行故說由依處
加行故說由勝解加行故說應知亦爾已說自性當
說所以問此四何緣說爲正斷答由此四種能正斷
故問前二可爾後二云何答以初爲名故無有失或
此四種皆有斷義謂前二斷煩惱障後二斷所知障
修善法時斷無知故暫斷永斷俱名斷故有處說此
名爲正勝無倒策發成勝事故問惡與不善何差別
答惡謂有覆無記不善謂諸不善有作是說惡謂色
無色界及欲界少分染法不善謂欲界多分染法有
說惡謂欲界身邊二見品不善謂欲界諸餘煩惱等

問何故惡不善法已生者說令斷未生者說令不生
答已生者於自相續已有作用故說令斷未生者於
自相續未有作用故說令不生有言已生者於自相
續已障聖道故說令斷未生者於自相續未障聖道
故說令不生有說已生者於自相續已取果與果故
說令斷未生者於自相續未取果與果故說令不生
有說已生者於自相續已取等流果異熟果故說令
斷未生者於自相續未取等流果異熟果故說令不
生有說已生者於自相續已爾同類徧行因故說令
斷未生者於自相續未爾同類徧行因故說令不生

有說已生者於自相續已燒已惱故說令斷未生者
於自相續未燒未惱故說令不生有說已生者於自
相續已作譏呵已作垢染已作膠澁已墮惡意故說
令斷未生者於自相續未作譏呵未作垢染未作膠
澁未墮惡意故說令不生問所修諸善隨爾所生卽
爾所滅無有生已過一剎那有停住義如何乃言於
已生善法爲令安住不忘倍修增廣耶答應知此中
說二分善法謂順住分順勝進分令安住不忘者說
順住分令倍修增廣者說順勝進分俱依相續展轉
勝進說安住等故無有失有說此中說三品善法謂

下中上令安住不忘者說依下品善根轉至中品令
倍修增廣者說依中品善根轉至上品雖一刹那生
已卽滅而依相續故作是說此正斷欲界有四色無
色界亦爾問欲界有惡不善法可說有四云何上界
亦說四耶答彼雖過患不具而具有彼功德有說彼
雖無所治而有能治問未至地可爾上地云何答有
多種對治謂捨對治斷對治持對治遠分對治猷壞
對治上地雖無捨及斷對治而有餘對治問靜慮可
爾無色云何答無色雖無壞對治而有持及遠分對
治此正斷學無學位各具四種問學位可爾有惡不

善法故無學云何答彼雖無過患而有功德有說彼
雖無所治而有能治謂多種對治如前說彼雖無捨
及斷而有所餘問緣涅槃精進何正斷攝有說初正
斷攝以斷卽涅槃故有說第二正斷攝以涅槃是不
生故有說第三正斷攝緣涅槃時善法生故有說第
四正斷攝緣涅槃時善法增故如是說者四正斷攝
緣涅槃時作四事故謂緣諸法擇滅性時卽令一切
惡不善法已生者斷未生不生及令一切世出世善
未生者生已生增廣四神足者一欲三摩地斷行成
就神足二勤三摩地斷行成就神足三心三摩地斷

行成就神足四觀三摩地斷行成就神足問云何名
神云何名足有作是說三摩地名神欲等四名足由
四法所攝受令三摩地轉故問等持俱有相應法多
何故此四獨名神足答此於等持隨順勝故謂於俱
有相應法中資益等於此四爲勝復有說者三摩地
是神亦足欲等四惟足非神如擇法是覺亦支餘六
惟支非覺正見是道亦支餘七惟支非道離非時食
是齋亦支餘七惟支非齋彼亦如是問若三摩地是
神亦足或應立一或應立五何故說四耶答惟三摩
地立爲神足從四因生故說爲四謂加行位或由欲

力引發等持令其現起廣說乃至或由觀力引令現
起由加行位四法隨增令等持起故得定位於一等
持建立四種已說自性當說所以問此四何緣說爲
神足答諸所思求諸所欲願一切如意故名爲神引
發於神故名神足然此神用略有二種一世俗所欣
二聖者所樂若分一爲多合多成一此等名爲世俗
所欣若於世間諸可意事不住順想於諸世間不可
意事不住違想於諸可意不可意事安住於捨正念
正知此等名爲賢聖所樂復有三種神用一運身二
勝解三意勢運身神用者謂舉身凌虛猶若飛鳥亦

如壁上所畫飛仙勝解神用者謂於遠作近解由此力故或住此洲手捫日月或屈伸臂頃至色究竟天越無邊世界問此三神用誰成就幾有說聲聞成一謂運身獨覺成二除意勢惟佛世尊具成三種有說異生成一謂運身二乘成二除意勢然聲聞運身所顯獨覺意解所顯佛具成三意勢所顯或復五種神用一業二異熟三變現四具德五發心業神用者謂中有等異熟神用者謂飛禽等變現神用者謂依靜慮分一爲多合多爲一等具德神用者謂四神足發

心神用者謂天龍等此中天者謂欲界天於所說五神用中此中說具德神用如契經說苾芻當知欲三摩地斷行成就修於神足依止離依止無染依止滅迴向於捨勤三摩地心三摩地觀三摩地說亦如是此中說何名爲離等有作是說是三摩地彼說若緣三摩地爲境修於神足由二緣故名依離等謂意樂故及所緣故若緣餘法爲境修於神足但由一緣名依離等謂意樂故非所緣故有餘師說是寂滅涅槃彼說若緣寂滅涅槃爲境修於神足由二緣故名爲離等謂意樂故及所緣故若緣餘法爲境修於神足

但由一緣名依離等謂意樂故非所緣故復有說者
是三摩地及寂滅涅槃彼說若緣此二爲境修於神
足由二緣故名爲離等謂意樂故及所緣故若緣餘
法爲境修於神足但由一緣名爲離等謂意樂故非
所緣故應知中依止離者謂初靜慮依止無染者
謂第二靜慮止滅者謂第三靜慮迴向於捨者謂
第四靜慮如經說苾芻當知何等名壽謂四神足
問何故神名 名何壽答由此爲依壽不斷故謂在
定位壽必無有 依此離壽穴故謂在定位遠離
壽穴有說依此壽自在故如契經說若有苾芻苾芻

尼等於四神足若習若修若多修習彼若希求住壽
一劫或一劫餘隨息自在由此故說神足爲壽如契
經說有一梵志來詣具壽阿難陀所種種愛語歡喜
問訊已退坐一面問阿難曰何故於沙門喬答摩所
勤修梵行問何故梵志作是問耶答彼是阿難昔時
朋友委知尊者是愛行人於五欲中先恒耽著故來
試驗爲求愛斷而修梵行爲求勝欲修梵行耶故作
斯問阿難答言我爲愛斷故在佛所勤修梵行問勤
修梵行斷七隨眠何故但言我爲愛斷答尊者慶喜
亦知梵志是愛行人耽著諸欲爲汲引故意云若汝

爲愛所纏欲求離者宜捨家法來世尊所隨我勤修
清淨梵行故方便答我爲愛斷婆羅門曰沙門喬答
摩實有道迹能斷愛不阿難陀曰實有勿疑汝若來
修定能斷愛梵志請曰願爲說之令我心開必當依
命尊者告曰惟我世尊如實知見說四神足依之修
習速離愛纏問若有能於四念住等三十七種菩提
分法隨一修習皆能斷愛何故但言修四神足答此
是愛結近對治故謂有愛者馳散諸緣等持能爲彼
近對治梵志復曰如仁所言神足無邊修何能盡問
梵志何故作是語耶答梵志意言此四神足其體徧

在學無學位彼卽無邊修何能盡修若不盡何能斷
愛阿難告曰此非無邊梵志復言請爲解說阿難告
言吾今問汝可隨意答於意云何汝曾生欲入園遊
不梵志曰然復問入園旣遊觀已生欲還不梵志曰
然復問二時所生樂欲豈不有異梵志曰然尊者告
言如汝生欲二時有異一欲入園二欲還出如是神
足學無學位亦各不同學位所修爲欲斷愛無學所
修爲現法樂隨所修異非謂無邊梵志如何謂修不
盡彼聞歡喜發淳淨心歸佛出家修於梵行五根者
謂信根精進根念根定根慧根五力亦爾此五隨名

卽心中各一爲性已說自性當說所以問何緣此
五名根名力答能生善法故名根能破惡法故名力
有說不可傾動名根能摧伏他名力有說勢用增上
義是根不可屈伏義是力若以位別下位名根上位
名力若以實義一一位中皆具二種此二廣辯如餘
處說七覺支者一念覺支二擇法覺支三精進覺支
四喜覺支五輕安覺支六定覺支七捨覺支擇法卽
慧喜卽喜根捨謂行捨餘四如名卽心中各一爲
性已說自性當說所以問何故此七名覺支耶答覺
謂究竟覺卽說無生智或如實覺卽無漏慧七爲彼

分故名爲支擇法亦覺亦支餘六是支非覺此七
辯如餘處說八道支者謂正見正思惟正語正業正
命正精進正念正定正見卽慧正思惟卽尋正語業
命卽隨心轉三根所發身語無表餘三如名卽心所
性已說自性當說所以問何故此八名爲道支答所
履通達故名爲道八是彼分故說名支正見亦道亦
支餘七是支非道此亦如餘處廣說四靜慮者謂初
靜慮乃至第四靜慮有說尋喜樂捨相應靜慮如次
爲四此有二種一修得二生得修得者卽彼地攝心
一境性若并助伴卽五蘊性生得者隨地所繫餘五

蘊爲性已說自性當說所以問此四何緣說爲靜慮
答靜謂寂靜慮謂籌慮此四地中定慧平等故稱靜
慮餘隨有闕不得此名此四廣如餘處分別四無量
者謂慈悲喜捨慈謂與樂作意相應無瞋善根爲性
悲謂除苦作意相應無瞋善根爲性有說不害爲性
喜謂慶慰作意相應喜根爲性有說以善心中欣
爲自性捨謂平等作意相應無貪善根爲性已說自
性當說所以問何故名無量答由此四種緣無量有
情故生無量善法故招無量勝果故廣說此四亦如
餘處四無色者謂空無邊處乃至非想非非想處此

亦二種一修得二生得修得者卽彼地攝心一境性
若并助伴卽四蘊性生得者卽彼地繫餘四蘊爲性
已說自性當說所以問何故此四說名無色答此四
地中超過一切有色法故違害一切有色法故色法
於此無容生故說名無色此四亦如餘處廣說入解
脫者一有色觀諸色解脫二內無色想觀外色解脫
三淨解脫身作證具足住四空無邊處解脫乃至七
非想非非想處解脫入滅受想解脫身作證具足住
此中前三無貪善根爲性若并助伴卽五蘊性次四
卽以彼根本地加行善四蘊爲性有說亦以彼近分

地前八解脫道爲性最後解脫以滅盡等至爲性已
說自性當說所以問何故名解脫答解脫所有彼能
障故餘義如餘處廣說八勝處者一內有色想觀外
色少乃至廣說二內有色想觀外色多乃至廣說三
內無色想觀外色少乃至廣說四內無色想觀外色
多乃至廣說觀青黃赤白復爲四種此八皆以無貪
善根爲性若并助伴卽五蘊性已說自性當說所以
問何故名勝處答降伏所緣摧滅貪愛故名勝處廣
分別義如餘處說十徧處者謂各別觀青黃赤白地
水火風卽爲前八九空無邊處十識無邊處此中前

八無貪善根爲性若并助伴卽五蘊性後二徧處卽
以彼地有漏加行善彼勝解俱品四蘊爲性已說自
性當說所以問何故名徧處答所緣廣普勝解無邊
故名徧處餘義如餘處說八智者謂法智類智世俗
智他心智苦智集智滅智道智非盡無生以位局故
此八皆以心所法中慧爲自性已說自性當說所以
問何故名智答於所緣法審觀決定故名爲智餘義
如餘處廣說三等持者一空二無願三無相此三皆
以心所法中三摩地爲性通有漏無漏此中惟說無
漏解脫門故若空無我二行相俱無漏等持名空三

摩地若無常苦因集生緣道如行出十行相俱無漏等持名無願三摩地若滅靜妙離四行相俱無漏等持名無相三摩地已說自性當說所以問何故名等持答平等持心令專一境有所成辦故名等持廣說此三如餘處辯四沙門果者一預流果二一來果三不還果四阿羅漢果此四各以二法爲住一無爲二有爲無爲果者謂預流果以三界見所斷擇滅爲性一來果以三界見所斷及欲界修所斷前六品擇滅爲性不還果以三界見所斷及欲界修所斷擇滅爲性阿羅漢果以三界見修所斷擇滅爲性有爲果者

隨其所應皆以無漏五蘊爲性已說自性當說所以問何故名沙門果答無倒勇勵息除染法名曰沙門是諸沙門所引所證名沙門果此亦如餘處廣說五通者一神境智通二天眼智通三天耳智通四他心智通五宿住隨念智通此五皆以慧爲自性已說自性當說所以問何故名通答於自所緣無倒了達妙用無礙故名爲通界者四惟色界繫他心智通色界繫及不繫地者在四靜慮根本地非近分非無色所以者何若地有五通所依殊勝三摩地彼地有五通近分無色無五通所依殊勝三摩地是故於彼無此

諸通有說若地奢摩他毗鉢舍那平等攝受彼地有五通近分無色隨一闕故無有五通所依者皆依欲色界行相者四種惟不明了行相他心智通若有漏亦不明了行相若無漏作道四行相所緣者神境智通緣欲色界或四處或二處天眼智通緣欲色界色處天耳智通緣欲色界聲處他心智通緣欲色界及不繫心心所宿住智通緣欲色界五蘊念住者前三惟身念住他心智通是三念住除身宿住智通惟法念住智者四種惟世俗智他心智通若有漏是世俗智他心智若無漏是法智類智道智他心智三摩地

俱者四種非三摩地俱他心智通若有漏亦非三摩地俱若無漏與道無願三摩地俱根相應者依種類說三根相應謂樂根喜根捨根世者五種皆墮三世前四過去緣過去現在緣現在未來若生緣未來不生緣三世宿住智通過去現在緣過去未來緣三世善等者天眼耳通是無記緣三種神境智通是善緣無記餘是善緣三種欲界繫等者四是色界繫緣欲色界繫他心智通是色界繫及不繫緣欲色界繫及不繫學等者四是非學非無學緣非學非無學他心智通是學無學非學非無學緣學無學非學非無

學見所斷等者三是修所斷緣修所斷他心智通是修所斷及不斷緣見修所斷及不斷宿住智通是修所斷緣見修所斷緣名緣義者宿住智通通緣名義餘四惟緣義緣自相續等者他心智通惟緣他相續餘四通緣自他相續及非相續加行離染得者問此五通爲加行得爲離染得若加行得者智蘊所說云何通如說若成就現在他心智亦成就過去未來耶答如是若離染得者此蘊前說云何通如說以無間道證神境智通時念住現在修一未來修四等非起先得有未來修有說惟加行得問智蘊所說云何通

答彼文應作是說若成就現在他心智未來定成就過去若已滅不失則成就若未已滅或已滅而失則不成就而不說者言勢所引總略答故有說惟離染得問此前所說云何通答說重調練菩提分法非初得修爾時但令先所得者轉明勝故如是說者皆通加行及離染得此蘊但說加行得者智蘊惟說離染得者如是便爲二說善通有說於彼離染得中有已曾習有未曾習智蘊說已曾習此蘊說未曾習如是亦爲二說善通離染得者謂初靜慮所引發者離欲界染時得乃至第四靜慮所引發者離第三靜慮染

時得若諸聖者及後有異生通得曾習未曾習餘唯
得曾習離染得已加行現前佛不加行獨覺下加行
聲聞或中或上又隨離染解脫道時所修得者皆離
染得若於餘時而修得者皆加行得何處起者欲色
界皆得起欲界中惟人天人中惟三洲通男女身異
生聖者學與無學皆得現起問諸通爲無間道攝爲
解脫道攝若無間道攝者經所說云何通如說分一
爲多合多爲一乃至廣說非無間道一剎那中有如
是事若解脫道攝者品類足說當云何通如說通云
何謂善慧天眼耳通解脫道是無記慧云何名通答
諸通是解脫道攝如沙門果解脫道攝非無間道此
亦如是問品類足說當云何通答彼所說通與此說
異彼說善慧皆名爲通以說一切法皆是所通達故
此中所說勝慧名通此通或善或是無記通與善慧
得作四句有通非善慧謂天眼耳通有善慧非通謂
除通餘善慧有俱是謂餘四通有俱非謂除前相問
此五通爲如說而生爲不爾有作是說如說而生謂
先起神境智通故佛前說乃至後起宿住智通故佛
後說謂彼聞色界天而不能往故先起神境通往而
不能見其色故次起天眼通見而不能聞其語故次

起天耳通聞而不能知其心故次起他心通知彼心
已未知宿世曾相遇不故後起宿住通世尊依此次
第而說如是說者次第無定謂或先起神境通乃至
或先起宿住通或有唯得神境通如天授等或有惟
得天眼通如善星等是故諸通無順入逆入亦無超
越次第如諸等至或如無量解脫勝處徧處間修起
神境天眼通時俱有光明此有何異答若修神境所
引光明或化所爲或自性有若修天眼所引光明非
化所爲惟自性有

阿毗達磨大毗婆沙論卷第一百四十一 說一切有部發智

音釋

阿毗達磨

梵語也此云無
比法毗頻眉切

膠漚

膠古肴切
漚乃定切

也 喬答摩

梵語也此云純
淑喬渠矯切

勵

力制切
勉力也

云止奢
詩車切 毗鉢舍那

梵語也此云觀毗
頻眉切鉢補未切

奢摩他

梵語
也此

浮渡居士吳用先施贊刻此
阿毗達磨大毗婆沙論第一百四十一卷
字六千七百二十五箇該銀三兩三錢六分
銀山釋海亮對長洲徐普書進賢萬世珍刻
萬曆丙辰歲仲夏五月徑山化城識

阿毗達磨大毗婆沙論卷第一百四十二

五百大阿羅漢等造

唐三藏法師玄奘奉詔譯

根蘊第六中根納息第一之一

二十二根眼根耳根鼻根舌根身根女根男根命根
意根樂根苦根喜根憂根捨根信根精進根念根定
根慧根未知當知根已知根具知根此二十二根幾
學幾無學幾非學非無學如是等章及解章義既領
會已應廣分別問何故尊者以二十二根而作論答
是彼尊者所樂欲故隨彼所欲不違法相而作斯論

不應責其所以有說不應問彼尊者以契經說二十
二根彼根契經是此論根本依彼經造論不可責其
因緣以彼尊者於佛所說二十二根不能少減說二
十一不能少增說二十三以佛所說無增減故不可
增減如不可增減不可多少不可損益無量無邊應
知亦爾以佛所說無量無邊不可於中作量邊故無
量者義難測故無邊者文難知故譬如大海無量無
邊無量者深無邊者廣世尊所說應知亦然雖百千
俱胝那庾多數如舍利子等諸大論師於佛所說二
句文義造百千論分別解釋盡其覺性不得邊際是

故不應責彼尊者問置彼尊者世尊何故說此契經
答觀所化者應聞此法得饒益故復次此經有別緣
起謂有梵志名曰生聞來詣佛所歡喜問訊在一面
坐而白佛言施設幾根攝諸根盡佛言我說二十二
根攝諸根盡若有遮此更說餘根當知彼說有言無
義若還問彼反生愚惑所以者何非其境故由梵志
問說此契經是故不應徵佛說意問置佛說意梵志
何故但問諸根不問蘊界處等答隨彼所疑而問不
應爲責或彼梵志性善尋思隨有所聞喜便歷問爲
知根義周遍遊歷九十六道問諸根量如離繫者施

設一根所謂命根遍內外物故彼立制不飲冷水不
斷生草以有命故問諸外道於外物中執有何根名
有根法答有於外物執有意根有於外物執有命根
有於外物執有二根由意根故名有根法由命根故
名有命法有於外物執有二根謂業與意隨應當說
又如外道波羅設利作如是說眼不見色耳不聞聲
名聖修根問何故彼名波羅設利答是所立名不應
問立名所以名隨假立不必皆有實義故有說此是
彼姓謂婆羅門有姓僑蹉有姓筏蹉有姓扇祇略有
姓僑陣那有姓婆羅情闍有姓波羅設利有說此是

雜種謂從刹帝利婆羅門生名波羅設利如從驢馬
所生名騾如是說者此是彼姓彼有弟子名唄怛羅
曾於一時來詣佛所歡喜問訊在一面坐佛時告曰
汝師波羅設利爲汝等說修根法耶唄怛羅言我師
曾說佛問云何彼云我師作如是說眼不見色耳不
聞聲名聖修根無所取故佛卽難曰若爾盲者應名
聖修根不見色故時阿難陀佛邊侍立爲佛搖扇尋
亦難言聾者亦應名聖修根不聞聲故問設有外道
百千俱胝那庾多數智慧辯才如舍利子佛皆能伏
何故世尊作初難已尊者慶喜作第二難世尊何故

而不遮止答佛觀慶喜咽喉有相知欲設難故便自
止以佛昔在三無數劫精勤修習菩薩行時尚不斷
他所有才辯乃至弟子亦不遮遏況今成佛斷他辯
才又佛了知若自所說若慶喜說平等無異無有增
減故不遮止又顯師與弟子俱能摧伏他故若師弟
子俱能伏者乃名善伏故不遮制又欲令彼無餘言
故謂若世尊作第一難慶喜不作第二難者則彼外
道還自衆中以餘慢心作如是言雖爲彼師所伏而
非弟子彼雖能伏我等而非我師若佛世尊作第一
難慶喜復作第二難者則彼永捨僞慢之心弟子尚
能摧伏我等何況彼師設我師來亦不能對何況我
等又欲滿彼梵志意故彼作是念喬答摩尊諸力士
中爲無有上能伏能破一切論者而無屈撓諸論師
中最爲尊勝往昔所有諸大論師尚無能對何況我
等若彼弟子與我談論我當酬對豈不宜哉佛一切
時滿所化意如其所念而汲引之故不遮止慶喜所
難復次佛以慶喜爲證義人故彼外道衆信重慶喜
以彼尊者形貌端嚴善知因陀羅聲明論故佛意令
彼問所信人自驗師宗應正理不慶喜時說故佛不
止復次欲顯世尊無勝已慮故謂諸外道慮弟子中

有勝已故遮其言辯佛無是事設有弟子百千俱眠
那庾多數辯才智慧如舍利子亦無問難與佛等者
況能勝佛復次欲顯已斷法慳垢故謂諸外道不許
弟子與他論難勿彼由斯多獲名譽恭敬利養佛則
不爾假使世間一切皆得無邊名利佛無一毫終無
嫉妬是故不止慶喜所說復次欲顯弟子亦勝他故
謂諸外道恐已門徒與他論難墮負受辱世尊弟子
無不勝他若論難時益更光揚如來正法故不遮制
復次爲欲顯示善說法中文義滿足無異見故謂諸
外道惡說法中文義乖違師徒見異隨有所立所說

所解師與弟子各各相違佛正法中無此過失隨有
所立所說所解弟子與師皆同一味由此等緣對彼
外道佛與慶喜各設一難問外道若許盲聾之人是
聖修根云何成難答是爲大難亦是總說外道過失
無能對者謂汝若許盲聾之人亦得名爲聖修根者
汝等何故棄捨居家晝夜精勤修諸梵行但應毀壞
眼耳二根自可名爲聖修根者故前所說是爲大難
亦是總訶一切外道又勝論者說有五根鼻舌眼身
耳根爲五又數論者說十一根謂五覺根五業根意
五覺根者所謂眼耳鼻舌身根五業根者謂語手足

大小便根意者意根爲第十一或復有說百二十根
謂眼耳鼻各二爲六舌身意命及五受根信等五根
總爲二十六趣各二十爲百二十彼說阿素洛爲第
六趣有說根是主義彼外道說有百二十主如天主
龍主阿素洛主及人主等要受如是百二十處勝妙
之身方得解脫生聞梵志聞如是等說根不同轉生
疑惑不知何者是其實說聞釋氏宮生一太子具三
十二大丈夫相八十隨好身真金色圓光一尋見者
歡喜覩無厭足捨輪王位踰城出家精勤修習難行
苦行證得無上正等菩提一切知者一切見者斷一

切疑網施一切決定能盡一切問難源底聞已卽時
來詣佛所在一面坐而白佛言說根者多沙門說幾
根攝諸根盡問何故梵志不以所聞說根差別請問
於佛而直作此問耶答彼有惡慧恐佛於他所說根
中擇善而說故作總問佛依彼問答言我說二十二
根攝諸根盡若有遮此更說餘根廣說乃至非其境
故問世尊何故復作是語若有遮此更說餘根當知
彼說有言無義若還問彼反生迷惑所以者何非其
境故答欲令彼知先所聞一根乃至百二十根皆非
實故義言我是一切知者一切見者尚不能於二十

二根中減一根說二十一增一根說二十三況諸外道僻見無知於諸根中有能增減說一乃至百二十耶由此因緣彼來詰佛但問根義非蘊界等問此二十二根名有二十二實體有幾答對法者言名二十二實體十七於中男女三無漏根無別體故問何故男女根無別體耶答此二卽是身根攝故如說女根云何謂身根少分男根云何謂身根少分問何故三無漏根亦無別體答此三卽是九根攝故九謂意根樂喜捨根信等五根此九根有位名未知當知根有位名已知根有位名具知根卽見道位修道位無學

道位如次應知又在隨信隨法行相續中名未知當知根在信解見至身證相續中名已知根在慧解脫俱解脫相續中名具知根九根聚集隨位說三故無別體由此故說二十二根名二十二實體十七尊者法救作如是說名二十二實體十四謂卽前五及命捨定無別實體故問何故彼說命根無實體答命根是不相應行蘊所攝彼說不相應行蘊無實體故問何故復說捨根無別體答彼說離苦樂受無別不苦不樂受所以者何諸所有受或樂或苦若非苦樂云何名受問若爾經說三受當云何通答彼作是說樂

受苦受有上有下有利有鈍有躁有靜諸上利躁者
名樂受苦受諸下鈍靜者名不苦不樂受此體不定
如疑而轉問何故彼說定根亦無別體答彼說離心
無定體故如說定云何謂心一境性由此諸根名二
十二實體十四尊者覺天作如是說名二十二實體
唯一所謂意根彼作是說諸有爲法有二自性一大
種二心離大種無所造色離心無心所諸色皆是大
種差別無色皆是心之差別由此義故實根唯一如
實義者應如初說名二十二實體十七如名體如是
名施設體施設名異相體異相名異性體異性名別
性體別性名分別體分別名覺悟體覺悟應知亦爾
是名諸根自性我物性相自體已說自性當說所以
問何故名根根是何義答增上義是根義明義是根
義現義是根義喜觀義是根義端嚴義是根義最義
是根義勝義是根義主義是根義問若增上義是根
義者諸有爲法展轉增上諸無爲法於有爲增上則
一切法皆應立根何故世尊立二十二脅尊者言佛
於諸法了達究竟善知諸法體相勢用餘不能知若
法有根相者立根無者不立不應責問有說增上緣
有下有上有劣有勝上勝立根下劣不立有說雖一

切法皆有增上緣義而非皆有增上明現乃至主義如二十二根者如一切有情雖皆互有增上緣義而有勝者如鬼界中琰摩王勝旁生趣中師子王勝村中主勝國中王勝四大洲中轉輪王勝於欲界中自在天勝千世界中梵王爲勝於三界中佛爲最勝佛於一切有情類中獨稱法王無倫匹故如是諸法雖皆是增上緣而非一切皆有增上乃至主義如二十二根者故佛惟說此二十二根問若增上義是根義者誰於何增上答眼根於四處增上一莊嚴自身二導養自身三爲識等依四作不共事莊嚴自身者雖爲增上導養自身者由眼根故見好惡色捨危就安令身久住爲識等依者眼識及相應法依此而生作不共事者惟眼根見色非餘根耳根於四處增上一莊嚴自身二導養自身三爲識等依四作不共事莊嚴自身者雖有妙身支分具足耳根若缺人不喜觀故於嚴身故於嚴身此爲增上導養自身者由耳根故聞好惡聲捨危就安令身久住爲識等依者耳識及相應法依此而生作不共事者惟耳根聞聲非餘根有餘師說眼根導養生身爲勝耳根導養法身爲勝如說

譬如明眼人 能避現險難 世有聰聞者

能離當苦惡 多聞能知法 多聞能離罪

多聞捨無義 多聞得涅槃

復有說者眼根耳根俱能導養生身法身導養生身如前說導養法身者由眼根故親近善士由耳根故聽聞正法由此能引如理作意法隨法行乃至展轉證得涅槃是故經說梵壽梵志勿壞二根謂眼與耳問何故於諸根聚中但說勿壞二根耶答由眼耳根佛出世時爲路爲門趣入佛法又由眼耳遇佛便能比知是佛如說苾芻汝若不能知佛心者應二處求

一所聞二所見由此偏說勿壞二根鼻舌身根皆於四處增上一莊嚴自身二導養自身三爲識等依四作不共事莊嚴自身者雖有妙身分具足三根隨缺人不喜觀導養自身者由此三根受用段食令身久住以段食是香味觸故爲識等依者鼻識及相應法依鼻根生舌識及相應法依舌根生身識及相應法依身根生作不共事者惟鼻能嗅惟舌能嘗惟身覺觸各非餘根意根於二處增上一能續後有二自在隨轉能續後有者如說識若不託母胎名色得成羯邏藍不不也世尊自在隨轉者如說

世間心所引 亦爲心所勞 心若於彼生
皆自在隨轉

有說意根於染淨品增上如說心雜染故有情雜染
心清淨故有情清淨男女二根於二處增上一有情
異二分別異有情異者由此二根令諸有情男女類
別分別異者由此二根形相言音乳房等別謂劫初
時無男女差別後於是處少造色生便有男女體類
狀貌顯形言音衣著飲食受用差別有說此二於染
淨品增上於染勝者非於姪欲此無疑故但由此二
若壞若闕於不律儀五無間業不能受作亦復不能

斷諸善根於淨勝者此男女根若壞若闕便不能起
一切律儀亦復不能離三界染不能種植三乘種子
命根於二處增上一令說有根二令根不斷命根若
在可說有根及令諸根相續住故有說命根於四處
勝一續衆同分二持衆同分三護養衆同分四令衆
同分不斷五受根於雜染品增上以諸有情由受勢
力四方追求遊於鐵鎖鉤索嶮路登山越谷匍匐偃
倒或入大海遇諸畏難謂波浪洄澆室獸摩羅黑風
旋風伏山難噴墮惡龍宮邏剎娑洲金毗羅難盜賊
難等如是種種皆因諸受問無漏受云何於雜染品

增上耶答初起加行及趣入時亦於雜染品增上謂
觀行者求彼受時亦須追求衣食等物由此勢力亦
生染故有說受於染淨俱勝樂受於染勝者如說於
樂受貪隨增於淨勝者如說樂故心定苦苦受於染勝
者如說於苦受瞋隨增於淨勝者如說苦苦爲信依不
苦不樂受於染勝者如說於不苦不樂受無明隨增
於淨勝者如說六出離依捨信等五根於清淨品增
上如說

信生能歸趣 越放逸流海 精進能除苦
慧能得清淨

又說我聖弟子具信伊師迦能捨不善修習善法又
佛告慶喜精進能得菩提又說我聖弟子具精進力
捨不善法修習善法又說念能徧行防護一切我聖
弟子具念防護捨不善法修習善法又說定是正道
不定是邪道定心得解脫非不定心定心能知諸蘊
生滅又說我聖弟子具三定曼能離不善修於善法
又說

慧爲世間上 能順趣決擇 能正知諸法
能盡老死苦

又說一切法中慧爲最上又說姊妹我聖弟子能以

慧刀斷諸結縛隨眠纏垢又說我聖弟子具慧垣墻能障惡法增長善法未知當知根於未見諦而見諦增上已知根於已見諦除煩惱過增上具知根於已除煩惱過得現法樂住增上由此各各於彼彼處有增上義故說爲根尊者寔沙筏摩作如是說惟意一種是勝義根是內是徧有所緣故是內者內處攝故是徧者從無間獄至有頂故有所緣者緣一切法故餘眼等根不具斯義是故不立爲勝義根謂眼等五雖內處攝而非是徧非有所緣命根雖徧而非內處亦非有緣苦樂憂喜雖有所緣非徧非內捨信等五

雖徧有緣而非內處三無漏根如九根說問若惟意是勝義根者餘二十一何故名根答彼與意根作所依作依作雜染作清淨作清淨位故亦名根誰作所依謂眼等五根誰作依謂命根誰作雜染謂五受根誰作清淨謂信等五根誰作清淨位謂三無漏根卽見位修位無學位問何故男女復得名根答生有情故生欲樂故制煩惱故爲染依故生有情者謂生胎身如依眉間初生聖樂後乃徧身此亦如是制煩惱者謂此志性能於慧時伏諸煩惱爲染依者謂染汙

識及相應法此爲所依餘處身根發三種識此惟發
染汙識非餘發此識時惟作習近意故必與貪俱尊
者僧伽筏蘇作如是說惟命等六是勝義根所謂眼
耳鼻舌身命有情本故問若命等六是勝義根者餘
十六種何故名根答與命等六作種子作雜染作清
淨作清淨位故亦名根誰作種子謂意根誰作雜染
謂五受根誰作清淨謂信等五根誰作清淨位謂三
無漏根卽見位修位無學位問何故男女亦得名根
答欲界有情欲爲種子欲爲苗稼此依何有謂男女
根是故此二亦得名根尊者妙音作如是說命等八

種是勝義根謂眼耳鼻舌身男女命有情本故問若
命等八是勝義根者餘十四種何故名根答與命等
八作種子作雜染作清淨作清淨位故亦名根廣如
前說問身根極微徧身等有何故此獨名男女根復
說爲顯答尊者世友作如是說此處能顯是男女故
名男女根復說爲顯問有二形者亦能顯耶答此不
能顯不決定故由此故說非男非女有說此處生流
轉者還滅者故外道六師補刺拏等名流轉者聲聞
獨覺及與如來名還滅者尊者說曰此處能生諸仙
牟尼諸聰慧者善調伏者易共住者故名男女根亦

說名顯已說諸根總相所以今當顯示一一別相問
根根云何答若已見色今見色當見色及此所餘是
名眼根已見色者說過去眼今見色者說現在眼當
見色者說未來眼此說同分及此所餘者說彼同分
眼如界中廣說乃至意根說亦如是問女根云何答
身根少分男根云何答身根少分命根云何答三界
壽樂根云何答依順樂觸所生身心樂平等受受所
攝是謂樂根苦根云何答依順苦觸所生身苦不平
等受受所攝是謂苦根喜根云何答依順樂觸所生
心悅平等受受所攝是謂喜根憂根云何答依順苦

觸所生心感不平等受受所攝是謂憂根捨根云何
答依順不苦不樂觸所生身心捨非平等非不平等
受受所攝是謂捨根信根云何答於出離遠離所生
善法諸信順印可忍受欲樂心清淨性是謂信根精
進念定慧根如文廣說問未知當知根云何答未見
諦者未現觀者諸學慧慧根及所有根隨信隨法行
於四聖諦未現觀能現觀是謂未知當知根此中於
四聖諦未已見故名未見諦者未已現觀故名未現
觀者諸學慧慧根者此說慧根及所有根隨信隨法
行於四聖諦未現觀能現觀者說餘八根總此九根

名未知當知根問此九根中何故慧根再說別說餘
根但作一總說耶答慧名義勝故謂根聚中慧爲最
勝如國中王勝村中主勝餘根不爾有說慧爲導首
故如說苾芻諸善法生明爲導首明爲前因由此引
生所有慚愧有說慧具三現觀故謂慧俱三現觀一
見現觀二緣現觀三事現觀慧相應法有二現觀謂
除見非慧性故慧俱有法有一現觀謂事非餘非慧
性故無所緣故有說慧見煩惱令不久住如穴居衆
生人若見時便還入穴有說慧照相續則煩惱不侵
如室有燈賊不能盜有說慧能照一切法外日月等

惟照一界一處一蘊一世少分慧能普照十八界十
二處五蘊三世及無爲法有說無慧者縛有慧者解
有說慧入佛法甚歡娛故謂佛法中以解爲勝是故
諸有慧者見妙法寶於中歡娛如明眼人入於寶窟
若無智慧雖入佛法無所見故常懷憂感如生盲人
至採寶所更增愁毒有說慧根如將如導如目如首
是覺覺支是道道支有說慧能導引餘菩提分令不
異趣如明眼者導衆盲人令行正路此亦如是有說
慧斷纏縛猶如利刀如說姊妹我聖弟子能以慧刀
斷諸縛隨眠纏垢有說慧如臺殿如尊者阿泥律陀

言我依戒住戒得昇無上智慧臺殿有說慧能安立
諸法自相共相能分別諸法自相共相破自體愚及
所緣愚於諸法中不增減轉有說慧是諸佛所愛敬
故佛不愛敬有情色力族姓財富自在但愛敬慧以
慧能證諸功德故有說慧能顯佛無與等故謂諸色
力族姓財富榮貴自在不能顯佛是最尊勝惟慧能
顯以一切智惟佛有故餘根不爾以如是等無量因
緣慧根餘根作差別說

阿毗達磨大毗婆沙論卷第一百四十二

音釋

說一切有部發智

僑蹉

僑舉裔切 筏

房越切 秩

直質切 僑陣那

梵語也此云火器陣

除吞

婆羅惰闍

梵語也此云利根情 驟

安靜也 嗚恒

梵語也此云火器陣

羅

梵語也此云疑滑羯 匍匐

匍匐切 蹉

匍匐切 澗

梵語也此云疑滑羯

藍

梵語也此云疑滑羯 匍匐

匍匐切 蹉

匍匐切 澗

梵語也此云疑滑羯

澗

澗戶恆切 積

積七迹切 窶

窶其矩切 蹉

梵語也此云疑滑羯

久也

補刺拏

梵語也此云圓滿刺 窶

窶其矩切 蹉

梵語也此云疑滑羯

浮渡居士吳用先施贊刻此
阿毗達磨大毗婆沙論第一百四十二卷
計
字六千三百八十五箇該銀三元乙錢九分
銀山釋海亮對長洲徐普書上元吳文科刻
萬曆丙辰歲夏五月徑山化城識

阿毗達磨大毗婆沙論卷第一百四十三
五百大阿羅漢等造
唐三藏法師玄奘奉詔譯

阿毗達磨大毗婆沙論卷第一百四十三

五百大阿羅漢等造

唐三藏法師玄奘奉詔譯

根蘊第六中根納息第一之二

問已知根云何答已見諦者已現觀者諸學慧慧根及所有根信解見至身證於四聖諦已現觀重現觀是謂已知根此中於四聖諦已見故名已見諦者已現觀故名已現觀者諸學慧慧根者此說慧根及所有根信解見至身證於四聖諦已現觀重現觀者說餘八根總此九根名已知根問諸無學者於四聖諦

論
天竺婆沙論卷第一百四十三
唯三

亦重現觀如從退法轉至思法乃至從堪達法轉至不動何故但說學重現觀非無學耶答亦應說無學而不說者當知有餘有說此中舉初顯後若說學重現觀當知已說無學亦重現觀如舉初顯後舉始入顯已度舉加行顯究竟當知亦爾有說若斷未曾斷煩惱得未曾得沙門果者說重現觀無學爾時非斷未曾斷煩惱亦非得未曾得沙門果是故不說有說若斷未曾斷繫得未曾得離繫得者說重現觀無學爾時雖得未曾得離繫得而不斷未曾斷繫得是故不說如斷繫得得離繫得除過患修功德捨下劣

證上妙去無義取有義盡渴愛苦受無熱樂應知亦爾有說捨未曾捨無智得未曾得智者說重現觀無學爾時雖得未曾得智而非捨未曾捨無智是故不說應知此依染無智說由如是等種種因緣學說重現觀非無學問具知根云何答漏盡阿羅漢諸無學慧慧根及所有根慧解脫俱解脫能得現法樂住此中漏盡阿羅漢諸無學慧慧根者此說慧根及所有根慧解脫俱解脫能得現法樂住者說餘八根總此九根名具知根問學者亦有現法樂住何故但說無學耶答亦應說學而不說者當知有餘有說此中舉

終顯始若說無學得現法樂住當知已說學亦得現法樂住如舉終顯始舉已度顯初入舉究竟顯加行當知亦爾復次此說名義勝者以法言之則無學法勝以補特伽羅言之則無學補特伽羅勝有說此中說得輕安樂非煩惱熱所損者學雖得輕安樂而猶爲煩惱熱所損是故不說復次此中說受輕安樂自在廣大者學於所作有所作故雖受輕安樂而不自在亦不廣大如王未除一切怨敵雖受王樂而不自在亦不廣大彼亦如是是故不說有說此中說已息煩惱意言已滿牟尼相者學則不然是故不說有說

此中說有現法樂住無後世樂住者學於二世皆有樂住是故不說由如是等諸因緣故無學說樂住非學問爲有三明阿羅漢不若有者此中何故不說若無者恣舉經云何通如說尊者舍利子恭敬合掌白佛言世尊此五百苾芻幾是三明幾是俱解脫幾是慧解脫此中因論生論尊者舍利子知是事不若知者何故問若不知者云何得名波羅蜜多聲聞應作是說彼尊者知若爾何故問亦有知而問者如毗柰耶說爾時世尊知而故問由此不應以知故遮其問有說尊者欲饒益他故謂舍利子雖自了知而知衆

中有不知者無無畏故不能問佛舍利子無是過故
爲饒益他所以發問有說尊者欲於總中顯差別故
謂佛爲五百苾芻如應說法彼聞皆得阿羅漢果永
斷後有稱可佛心一切有情真實稱可佛心者謂得
阿羅漢果永斷後有尊者舍利子作是念彼諸苾芻
雖皆得阿羅漢果永斷後有而未知彼誰先來勤修
加行誰不爾欲於總中顯有差別故發斯問有說世
尊先爲五百苾芻說法令等住果尊者舍利子欲顯
彼道有差別故是以發問有說世尊先爲五百苾芻
說法令住平等無爲解脫尊者舍利子欲顯彼有爲

解脫非無異故而發斯問有說尊者欲顯發功德伏
藏令世共知故如世伏藏土所覆故世人不見若因
開發乃得見之生希有想如是功德寶藏以少欲土
覆世無知者由舍利子所顯發故世人共知生希有
想有說尊者欲發施主增上思故有諸施主兩四月
中以衣服等供給僧衆彼或生念我所施田爲良美
不爲欲令彼生決定知我等已於良田植福快哉所
作功不唐捐是故尊者發如是問有說尊者欲顯師
徒儀式法應爾故謂弟子法應問師師法應教弟子
有說尊者顯已求法無厭離諸懈慢令他亦然是以

論
大毘婆沙論卷一百四十三
四
故問有說尊者欲斷世人少有所知便生慳足不問
他故彼尊者念言世人智慧於我所有十六分中不
能及一我猶問他何況汝等少知少見而不問耶有
說尊者欲顯離法慳垢故謂法慳者見他問時尚不
生喜何況自問有說尊者欲止外道誹謗故謂諸外
道恒謗佛言沙門喬答摩攝受鄔波底沙俱履多故
夜從受法晝爲他說若舍利子於大眾前合掌恭敬
而請問者此謗便止有說尊者欲顯世尊弟子所有
善說皆須佛印印之故發斯問如王所司所有符疏
若無王印人不承受往關津等悉爲障礙若有王印

人皆信用所往無礙如是佛弟子所有善說若無佛
印他不信受如來滅後所有四衆亦不敬受若爲佛
印所印可者聞則奉行遺法四衆亦生敬重由此等
緣彼舍利子而作斯問若無三明阿羅漢者彼經所
說云何通耶答應說有三明阿羅漢問若爾彼經善
通此中何故不說答此中應作是說及所有根慧解
脫俱解脫三明能得現法樂住而不說者當知有餘
復次已說在先所說中謂三明阿羅漢或是慧解脫
或是俱解脫若說慧解脫當知已說慧解脫三明若
說俱解脫當知已說俱解脫三明故不別說昔於此

義有二論師一名時毗羅二名婁沙伐摩尊者時毗羅偏稱讚慧尊者婁沙伐摩偏稱讚滅定時毗羅作如是說慧勝非滅定慧有所緣滅定無所緣故婁沙伐摩作如是說滅定勝非慧滅定惟聖者有慧通異生有故稱讚慧者作如是言若具三明非八解脫者是名三明若具三明亦八解脫者亦名三明若具八解脫非三明者是名俱解脫若有一明二明是名慧解脫所以者何以慧勝滅定故稱讚滅定刀才作如是言若具八解脫非三明者是名俱解脫右具八解脫亦三明者亦名俱解脫若具三明非八解脫者是名

三明若有一明二明名慧解脫所以者何以滅定勝慧故此二所說俱唐捐其功於文無益於義無益然具三明者有得滅定有不得滅定若得者名俱解脫三明若不得者名慧解脫三明今當重說三無漏根一一立名差別所以問何故名未知當知根答未已知而知未已現觀而現觀斷無智故名未知當知根問若如是者苦法智忍生於欲界五蘊苦得現觀苦法智生於彼復得現觀則是現觀已復現觀何故猶名未知當知根不名已知根耶答苦法智忍於欲界五蘊苦名現觀非已現觀苦法智生乃名已現觀然

非已現觀而現觀故不名已知根有說苦法智忍於
欲界五蘊苦雖名現觀而不名知非智性故苦法智
生乃得名知爾時雖名已現觀而現觀而非已知而
知故不名已知根又此中依智現觀而作論非忍故
亦不名已現觀而現觀如何名已知根有說苦法智
後復有未已現觀道生此智爲未已現觀覺所凌所
覆以下著上彼增上力故此不自在由此苦法智不
名已知根餘忍智亦爾問何故名已知根答已知而
知已現觀而現觀斷無智故名已知根問若如是者
道類智忍生除其自性相應俱有法於餘一切類智

品道皆得現觀此後道類智生於道類智忍自性相
應俱有法乃得現觀爾時於彼忍自性等未已現觀
而現觀何故名已知根不名未知當知根答外國師
說十六心剎那皆是見道問今不問彼但問十五心
剎那爲見道者何故爾耶尊者僧伽筏蘇說曰道類
智忍現在前時能修未來無量剎那道類智忍彼所
修者於現在忍等已得現觀故無有過此不應理未
來道無作用故應作是答從多分說名已現觀謂已
現觀者無量無邊未已現觀者但有少許已現觀而
現觀者猶如大地未已現觀而現觀者但如一塊妙

高一塵大海一滴虛空蚊處喻亦如是故從多分名
已知根問第十六心頃應如七智何故獨說爲已知
根非已知而知故答此亦從多分說謂初剎那雖與
七智相似後諸剎那皆與彼異從多分說悉名已知
根一類性故有說此後更無未已知知道所凌所覆不
以下著上令不得自在必當爾故於知言已知如去
時名已去彼亦如是問何故名具知根答已知而知
已現觀而現觀不斷無智先已斷故名具知根問若
如是者三乘無學皆是具知何故世尊獨名爲佛答
能初覺故能徧覺故能別覺故說名爲佛聲聞獨覺

不能初覺不能徧覺不能別覺故不名佛有說若於
爾燄自覺徧覺無錯謬覺說名爲佛獨覺雖能自覺
無餘二種聲聞俱無故不名佛有說若於諸緣能自
然覺一切種覺說名爲佛獨覺雖有自然覺而無一
切種覺聲聞俱無故不名佛有說若智於能覺所覺
行相所緣根根義有境界爾燄中能徧明覺說名爲
佛二乘不爾有說若有聞而不捨說名爲佛二乘不
爾有說若相續中永伏一切非理習氣說名爲佛二
乘不爾有說若有於甚深緣起河能盡源底說名爲
佛二乘不爾故經喻以三獸渡河謂兔馬象兔於水

上但浮而渡馬或履地或浮而渡香象恒時踏底而渡聲聞獨覺及與如來渡緣起河如次亦爾有說若斷一種無知謂染不染說名爲佛聲聞獨覺惟能斷染不斷不染故不名佛有說若斷二種疑惑謂事隨眠說名爲佛聲聞獨覺雖斷隨眠而不斷事故不名佛有說若盡智時二障俱斷心得解脫諸煩惱障及解脫障說名爲佛聲聞獨覺或先脫煩惱障後解脫障或先脫解脫障後煩惱障無俱脫者故不名佛有說若具二圓滿者說名爲佛謂所依能依諸餘有情或所依圓滿非能依如轉輪王或能依圓滿非所依

謂聲聞獨覺惟佛具二故得佛名如所依能依器器中處處中明與行應知亦爾有說若三事圓滿說名爲佛謂色族辯二乘不爾有說若三事圓滿說名爲佛謂立誓果成恣問二乘不爾有說若具三不護三不共念住說名爲佛二乘不爾有說若所言無二辯才無竭所記無謬說名爲佛二乘不爾有說若具四智說名爲佛謂因智時智相智說智二乘不爾有說若具四智說名爲佛謂無著智無礙智無謬智不退智二乘不爾有說若具種種因覺種種果覺種種相續覺種種對治覺說名爲佛二乘不爾有說若世八

法所不能染功德彼岸無能逮者一切危扼堪能拔濟說名爲佛二乘不爾有說若具十八不共佛法十力四無所畏大悲三不共念住說名爲佛二乘不爾有說若有深遠微細徧行平等大悲心者說名爲佛深遠者三無數劫所積集故微細者覺三苦故徧行者緣三果故平等者於怨親中無異轉故由如是等種種因緣於三具知惟一名佛問世尊何故於色蘊中惟立眼處等爲根非色處等耶答由色處等無根相故有說內處攝者立根外處攝者不立有說若亦作所依者立根惟作所緣者不立有境境說亦爾有

說若惟有情數攝者立根若不立者不立有說若惟是有執受者立根若非及不定者不立有說若惟相續攝者立根不定者不立有說若惟自相續受用者立根不定者不立有說不共者立根共者不立問世尊何故於受蘊中苦受樂受各立二根不苦不樂受惟立一耶答不苦不樂受亦應立二而不立者當知是有餘說復次欲以種種文種種說莊嚴於義令易解故復次欲現二門二略乃至廣說復次苦樂二愛有明利有不明利有輕躁有不輕躁有安住有不安住諸明利輕躁不安住者立憂喜受諸不明利不輕

躁安住者立苦樂受不苦不樂受惟不明利不輕躁
安住故合立一復次苦受樂受轉有異故各分爲二
謂樂根轉異喜根轉異苦根轉異憂根轉異不苦不
樂受無異轉故合立爲一復次苦受樂受互相違故
各分爲二謂苦樂相違憂喜相違不苦不樂受無此
相違故但說一問何故想蘊不立爲根答非根法多
何獨問想問如色蘊行蘊少分立根受蘊識蘊皆立
爲根惟想不立所以故問答以想無根相故復次根
者自力轉想由他轉如傭作人他教卽作不教不作
想於境轉亦復如是謂受思識領納造作了別境已

想方取相復次根者自在不爲他覆想爲慧覆故不
說根謂善想爲善慧所覆如於善事善取相者世間
說此名聰慧人無記想爲無記慧所覆如於世務善
取相者世便記此名巧慧人染污想爲顛倒慧所覆
如說於無常起常想顛倒乃至於非我起我想顛倒
尊者世友說曰想何故不立根答增上義是根義想
增上少故不立根問想亦有增上如說一切有爲法
展轉增上諸無爲法於有爲增上答我說少不說無
也又說根者能害煩惱想不能害煩惱問想亦能害
煩惱如說苾芻於無常想若習若修若多修習能除

一切欲貪色無色貪答此於慧說想名也大德說曰
根是主義不隨於他想則隨他餘心心所分別境已
方能取相故不立根尊者衆世說曰根者沉實想用
浮虛故勝解觀名爲假想世亦於彼不實解中言是
汝想尊者覺天說曰根者決定難可搖動想用隨緣
轉易不定如影像陽燄故不立根問何故煩惱不立
爲根答彼無根相是以不立有餘師說增上是根煩
惱下劣問煩惱能令諸有相續壞諸善品令没生死
令遠涅槃難可調伏云何下劣答以諸煩惱鄙賤可
訶智者棄之故名下劣非無勢用名爲下劣如旃荼

羅補羯娑等雖有勢用亦名下劣以諸勝人所輕賤
故問若爾染污受應不立根答受於染品勢用增上
故立爲根煩惱不爾以依諸受生煩惱故問若爾想
應立根亦能生煩惱故答想雖能生煩惱而不及受
勝由此義故亦不說在緣起支中有說受雖隨順染
品而亦與善法交通煩惱惟於染品隨順而不順善
故不立根猶如獄正所居雖下而與貴勝交往非如
守門獄卒雖有威猛苦切於人而極鄙惡可厭賤故
貴勝離之尊者僧伽伐蘇說曰若法有染無染身中
可得者立根煩惱惟於有染身中可得故不立根若

爾憂根及具知根皆不應立憂根但於有染身中可得具知根但於無染身中可得故有說根是主義煩惱非主是心所法故若爾受等亦應不立由此因緣前說爲善問何故受善染無記皆立爲根慧念定惟善立根非染無記答受於順雜染品勢用增上善染無記受皆有勢力順雜染品故並立根慧念定三順清淨品勢用增上惟善慧念定順清淨品故立爲根染慧念定乃相資助斷清淨品無記慧等亦於淨品不順是故皆不立根有餘師說受於三品皆有勢用故並立根慧念定三惟於淨品有勢用故惟善立根

所以者何諸受力故令有情類於諸善染無記事轉由受於淨品勝故說在覺支靜慮支中於染品勝故說在十二緣起支中於非二品勝者謂由受故造作種種無記事業慧等不爾由此應知意根亦於三品勝故善染無記皆立爲根於三勝者以三品法皆依心故問何故作意勝解觸欲不立爲根答無根相故謂作意雖能發動於意趣所緣境非一切時恒有勝用故不立根問此於淨品豈無勝用諸修定者初修定時無不皆由作意力故答初修定時令心趣境雖暫有力心住境已便無勝用故不立根勝解雖能令

心於境印可決定而於生長無別勝用故不立根問
豈不勝解於善法中亦有勝用於戒等五蘊十無學
支中皆建立故答於離染位離染相顯立解脫蘊正
解脫支除此更無生長勝用以無根相不立爲根觸
雖令心觸對於境順生諸受然於染淨無別勝用故
不立根問豈不生受卽是勝用答受於染淨有勝功
能可立爲根觸惟生受於染淨品無親勝用又觸惟
能隨順染品非順淨品故不立根多順淨品立諸根
故卽由此故欲不立根亦於淨品無勝用故問經說
諸法欲爲根本諸染淨品皆從欲生如何於淨無有

勝用答雖染淨品無欲不生契經說爲諸法根本然
既生已便無勝用又多順愛故不立根順下賤法非
增上故問思能令心造作善惡立爲意業能發身語
能感生死有增上用勝於餘法何不立根答惟順雜
染非清淨品故不立根有說諸業從煩惱生煩惱鄙
賤非增上故不立爲根業亦應爾如鄙賤人所生男
女人皆厭棄不與交婚諸業亦然故無根義問何故
善心所法中惟二立根餘皆不立答餘並無根相故
謂信能爲諸善根本無有善品離信而成精進普能
策發衆善無有善品離精進成故此二法增上義勝

論
卷之三
三

可立爲根餘則不爾問慙愧二種自性善攝說爲白
法何不立根答此能對治徧不善心一向黑品自性
不善故說名白及自性善然於生長諸善法中無別
勝能故無根義問無貪無恚名爲善根此中何故不
立爲根答彼建立根與此義異謂彼所治與六識俱
通五所斷是隨眠性能發麤重身語惡業與斷善根
作勝加行具斯五義立不善根無貪等三能對治彼
及起諸散善業故名善根此中信等立根通望生長
一切善法多依隨順出世善品故無貪等於此非根
問輕安不害不放逸捨何不立根答無根相故謂彼

所治四隨煩惱三惟徧染心一爲惡尋件惱亂菩薩
障取菩提故善法中立彼能治然於生長清淨品法
無勝所作故不立根問諸善皆依不放逸起云何說
所作非勝耶答此但能除諸放逸法故令諸善品依
信等生非彼親能有生長用問欣厭何故不立根耶
答於散位中此用雖勝於定善位用不分明根用必
於兩位中勝而於定位明了增強故彼二法無有根
義問若爾何故立信爲根答澄淨用通一切位非惟
散位是故立信問惡作睡眠及與尋伺何故非根答
無根相故謂前二種惟在散心後二不通一切界地

又皆無有生善勝能故皆不說有其根義問若爾苦
等四受應不立根答總而言之受徧諸位依彼種類
皆說爲根又受皆有生長增上彼四不爾問道支寧
立尋靜慮支中立尋伺豈非生長有增勝耶答此於
定慧有策持力故立爲支非於生長有增上用是故
非根問何故於諸不相應行惟命立根答惟命根有
根義故謂彼惟是有情數攝惟是異熟能徧任持故
立爲根餘皆不爾所以者何四有爲相三義皆無無
想異熟無徧持義其衆同分非惟異熟由彼亦通等
流性故二無心定名句文身非得等無後二義故

彼一切皆不立根問若最勝義是根義者涅槃於一
切法中最勝何不立根答彼是諸根盡滅處故根盡
滅處不名爲根如瓶等壞處不名瓶等有說若法行
世取果與果有諸作用了知所緣可立爲根涅槃不
爾有說若法生滅有因有果有有爲相可立爲根涅
槃不爾有說根者屬因屬緣和合而生涅槃不爾有
說若法爲生所生爲老所老爲滅所滅可立爲根涅
槃不爾有說根者墮蘊墮世衆苦所隨涅槃不爾有
說根者有前後相上中下相涅槃不爾有說最勝是
根義者謂於有爲中勝而有作用涅槃乃一切法中

論
卷一百四十三
三

最勝而無作用故不立根虛空非擇滅不立根義准此應知

阿毗達磨大毗婆沙論卷第一百四十三說一切有部發智

音釋

傲五到切備干封切
据也 雇作也

浮渡居士吳用先施貴刻此

阿毗達磨大毗婆沙論第一百四十三卷計字六千五百二十箇該銀三兩二錢六分
銀山釋海亮對長洲徐普書深水端司克刻
萬曆丙辰歲仲春二月徑山化城識

阿毗達磨大毗婆沙論卷第一百四十四

五百大阿羅漢等造

唐三藏法師玄奘奉詔譯

根蘊第六中根納息第一之三

此二十二根幾學幾無學幾非學非無學答二學一無學十非學非無學九應分別二學者謂未知當知根已知根一無學者謂具知根十非學非無學者謂七色命苦憂根九應分別者謂意樂喜捨信等五根此皆應作三分而答故名應分別一作學分二作無學分三作非學非無學分分別論者言此應作分別

記故名應分別謂意根或學或無學或非學非無學云何謂學作意相應意根此復云何謂從苦法智忍乃至金剛喻定相應意根云何無學謂無學作意相應意根此復云何謂盡智無生智無學正見相應意根云何非學非無學謂有漏作意相應意根此復云何謂有三種何等爲三謂善染汙無覆無記善復有三謂加行得離染得生得加行得者復有三種謂聞所成思所成修所成聞思所成者謂不淨觀持息念念住等相應修所成者謂煖頂忍世第一法現觀邊世俗智靜慮無量無色解脫勝處徧處等相應離染

得者謂由離染時得卽靜慮無量無色解脫勝處徧處等相應生得者謂生時所得善染汙有二種謂見所斷修所斷無覆無記有四謂威儀路工巧處異熟生及變化等通果心如意根樂根喜根捨根信根精進根念根定根慧根亦爾然有差別謂信等五除染無記餘隨所應問何故此中明意根等惟說作意相應非餘答彼作論者意欲爾故乃至廣說脇尊者曰此不應問一切有疑說餘相應亦生疑故但不違理隨說無過有說作意順生心勝故謂相應法中順生心者惟作意勝如不相應中順生法者惟有生相是

故偏說有說作意是警覺相是牽引相令意相等取
所緣勝是故偏說有說作意能生諸法勝於餘法是
故偏說已分別諸根學等自性雜無雜相今當說諸
根學彼是學者根耶答應作四句有根學彼非學者
根謂學根學者不成就此復云何謂隨信行不成就
隨法行諸根隨法行不成就隨信行諸根信勝解不
成就見至諸根見至不成就信勝解諸根退法性學
不成就五性學諸根乃至不動法性學不成就五性
學諸根佛乘性學不成就餘二乘性學諸根乃至聲
聞乘性學不成就餘二乘性學諸根住苦法智忍位

不成就上學位諸根乃至住道類智忍位不成就上
學位諸根住學三果未上進位不成就下上學位諸
根住上進位如應廣說有是學者根彼根非學謂非
學非無學根學者成就此復云何謂諸學者生欲界
已得眼根不失及生色界彼成就眼根已得者謂鉢
羅奢佉位等不失者謂不失壞如眼根耳鼻舌根亦
爾生欲色界彼成就身根女成就女根男成就男根
生徧淨及下成就樂根生欲界成就苦根生極光淨
及下成就喜根未離欲染成就憂根意命捨根一切
成就生欲界未得無色界善心彼成就欲色界信等

五根若得無色界善心成就三界信等五根生色界未得無色界善心彼成就色界信等五根若得無色界善心成就色無色界信等五根生無色界彼成就無色界信等五根有根學彼亦學者根謂學根學者成就此復云何謂隨信行成就隨信行諸根隨法行成就隨法行諸根信勝解成就信勝解諸根見至成就見至諸根退法性學成就退法性學諸根乃至不動法性學成就不動法性學諸根佛乘性學成就佛乘性學諸根乃至聲聞乘性學成就聲聞乘性學諸根住苦法智忍位成就苦法智忍位諸根乃至住道

類智忍位成就一切見道諸根住學三果未上進位各成就所住果所攝諸根住上進位各成就所得果及勝果道所攝諸根有根非學彼亦非學者根謂無學根及非學非無學根學者不成就此復云何謂諸學者定不成就無學諸根及有非學非無學根學者不成就謂諸學者生欲界不得眼根設得而失及生無色界彼不成就眼根不得者謂未至鉢羅奢佉位等設得而失者謂已失壞如眼根耳鼻舌根亦爾生無色界彼不成就身根女不成就男根男不成就女根有俱不成就謂生色無色界及生欲界或本不得或

論
已得漸命終等捨生徧淨上不成就樂根生色無色
界不成就苦根生極光淨上不成就喜根已離欲染
不成就憂根生欲界未得無色界善心彼不成就無
色界信等五根生色界未得無色界善心彼不成就
欲無色界信等五根生無色界彼不成就欲色界信
等五根諸根無學彼是無學者根耶答應作四句有
根無學彼非無學者根謂無學根無學者不成就此
復云何謂時解脫不成就不時解脫諸根不時解脫
不成就時解脫諸根退法不成就五種諸根乃至不
動法不成就五種諸根佛不成就獨覺聲聞諸根獨

覺不成就佛聲聞諸根聲聞不成就佛獨覺諸根有
是無學者根彼根非無學謂非學非無學根無學者
成就此復云何謂無學者生欲界已得眼根不失及
生色界彼成就眼根如眼根耳鼻舌根亦爾生欲色
界彼成就身根女成就女根男成就男根生徧淨及
下成就樂根生欲界成就苦根生極光淨及下成就
喜根意命捨根一切成就生欲界彼成就三界信等
五根生色界彼成就色無色界信等五根生無色界
彼成就無色界信等五根有根無學彼亦無學者根
謂無學根無學者成就此復云何謂時解脫成就時

9170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

論
解脫諸根不時解脫成就不時解脫諸根退法成就
退法諸根乃至不動法成就不動法諸根佛成就佛
諸根獨覺成就獨覺諸根聲聞成就聲聞諸根有根
非無學彼亦非無學者根謂學根及非學非無學根
無學者不成就此復云何謂無學者定不成就學諸
根及有非學非無學根無學者不成就謂無學者生
欲界不得眼根設得而失及生無色界彼不成就眼
根如眼根耳鼻舌根亦爾生無色界彼不成就身根
女不成就男根男不成就女根有俱不成就謂生色無
色界及生欲界或本不得或已得而失生徧淨上彼

不成就樂根生色無色界彼不成就苦根生極光淨
上彼不成就喜根定不成就憂根生色界彼不成就
欲界信等五根生無色界彼不成就欲色界信等五
根諸根非學非無學彼是非學非無學者根耶答諸
非學非無學者根彼根非學非無學所以者何以成
就學法即名學者成就無學法即名無學者若不成就
就學無學法名非學非無學者即是異生彼所成就
根惟是非學非無學故有根非學非無學彼非非學
非無學者根謂非學非無學根非學非無學者不成
就此復云何謂諸異生生欲界未得眼根設得而失

論
卷之二
五
四

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

及生無色界彼不成就眼根如眼根耳鼻舌根亦爾
生無色界彼不成就身根女不成就男根男不成就
女根有俱不成謂生色無色界及生欲界或本不得
或已得而失生徧淨上不成就樂根生色無色界不
成就苦根生極光淨上不成就喜根離欲界染不成
就憂根斷善根者不成就三界信等五根生欲界不
斷善根若未得色界善心彼不成就色無色界信等
五根若得色界善心未得無色界善心彼不成就無
色界信等五根生色界若未得無色界善心彼不成就
就欲無色界信等五根若得無色界善心彼不成就

欲界信等五根生無色界彼不成就欲色界信等五
根已分別諸根學等彼學等義今當說問云何名學
無學非學非無學耶答以無貪道為斷貪故而學此
道所攝法名學以無貪道為斷貪故而不學已學故
此道所攝法名無學與二相違名非學非無學復次
以無瞋道為斷瞋故而學此道所攝法名學以無瞋
道為斷瞋故而不學已學故此道所攝法名無學與
二相違名非學非無學復次以無癡道為斷癡故而
學此道所攝法名學以無癡道為斷癡故而不學已
學故此道所攝法名無學與二相違名非學非無學

9
170
1
2
3
4
5
6
7
8
9
180
1
2
3
4
5
6
7
8
9
190
1
2
3
4
5
6
7
8
9

復次以無愛道爲斷愛故而學然非愛事此道所攝
法名學以無愛道爲斷愛故而學者此則遮無學道
然非愛事者此則遮世俗道以無愛道爲斷愛故而
不學已學故然非愛事此道所攝法名無學以無愛
道爲斷愛故而不學已學故者此則遮學道然非愛
事者此則遮世俗道與二相違名非學非無學復次
若道爲斷二求滿一求故而學此道所攝法名學爲
斷二求者謂欲求有求滿一求者謂梵行求若道爲
斷二求滿一求故而不學已學故此道所攝法名無
學與二相違名非學非無學復次若道爲斷煩惱修

諦現觀故而學此道所攝法名學若道爲斷煩惱修
諦現觀故而不學已學故此道所攝法名無學與二
相違名非學非無學復次若所依中有煩惱得隨縛
有無漏得隨逐彼是學若所依中無煩惱得隨縛有
無漏得隨逐彼是無學與二相違名非學非無學復
次若所依中有愛隨縛有無漏得彼是學若所依中
無愛隨縛有無漏得彼是無學與二相違名非學非
無學復次若法見道修道所攝是學若法無學道所
攝是無學與二相違是非學非無學見地修地無學
地說亦爾復次若法未知當知根已知根所攝是學

若法具知根所攝是無學與二相違是非學非無學
復次五種補特伽羅相續中諸無漏法是學五種補
特伽羅者謂隨信行隨法行信勝解見至身證二種
補特伽羅相續中諸無漏法是無學二種補特伽羅
者謂慧解脫俱解脫與二相違是非學非無學復次
七種補特伽羅相續中諸無漏法是學七種補特伽
羅者謂四向前三果一種補特伽羅相續中諸無漏
法是無學一種補特伽羅者謂阿羅漢果與二相違
名非學非無學復次十八種補特伽羅相續中諸無
漏法是學九種補特伽羅相續中諸無漏法是無學

與二相違是非學非無學此二十二根幾善幾不善
幾無記答八善八無記六應分別八善者謂信等五
三無漏根八無記者謂七色命根六應分別者謂意
五受此復云何謂意根或善或不善或無記云何善
謂善作意相應意根此有二種謂有漏無漏有漏有
三謂加行得離染得生得無漏有二謂學無學云何
不善謂不善作意相應意根此有二種謂見所斷修
所斷卽欲界三十四隨眠俱生作意相應意根云何
無記謂無記作意相應意根此有二種謂有覆無記
無覆無記有覆無記者謂欲界有身見邊執見及色

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

無色界一切煩惱俱生作意相應意根無覆無記者
謂威儀路工巧處異熟生通果俱生作意相應意根
如意根捨根喜根樂根隨應亦爾苦根或善或不善
或無記云何善謂善作意相應苦根此復云何謂生
得善云何不善謂不善作意相應苦根此復云何謂
修所斷云何無記謂無記作意相應苦根此復云何
謂異熟生憂根或善或不善云何善謂善作意相應
憂根如說我於何時當於是處得具足住若於聖處
已具足住於上解脫希求思慕心懷憂感云何不善
謂不善作意相應憂根此復云何謂見所斷及修所

斷問何故無有無記憂根答無記有二謂有覆無覆
憂根且非有覆無記由與欲界有身見邊執見不相
應故所以者何行相異故彼二見歡行相轉憂根感
行相轉互相違法不相應故憂根亦非無覆無記非
威儀路工巧處異熟生所攝故問何故憂根非威儀
路所攝答憂根分別轉威儀路無分別轉若威儀路
有憂根者設有分別我今應作如是威儀如佛世尊
或如馬勝即分別時便應已住如是威儀然威儀路
無此分別故威儀路無有憂根問何故憂根非工巧
處答憂根分別轉工巧處無分別轉若工巧處有憂

論
天竺經論卷二百四十四
唯四

論
根者設有分別我今應作如是工巧如佛世尊或如
妙業天子卽分別時已應成辦如是工巧然工巧處
無此分別故工巧處無有憂根問何故憂根非異熟
生答憂根分別轉異熟生無分別轉若異熟生有憂
根者設有分別我今應受如是異熟如佛世尊或如
轉輪聖王卽分別時便應現受如是異熟然異熟生
無此分別故異熟生無有憂根有說憂根現加行轉
異熟生先業所引是故憂根非異熟生有說憂根隨
欲而轉以於一切亡失事中有起憂根有不起故異
熟生者不隨欲受由業轉故是故憂根非異熟生有

說憂根若是果熟則應重業但受少果謂有因作無
間業已便生憂悴卽應名爲受彼異熟豈非異少有
說憂根離欲時捨異熟生法離三界染而猶隨轉是
故憂根非異熟生由此憂根惟善不善已分別諸根
善等彼善等義今當說問云何名善不善無記耶答
若法巧便所攝能招愛果自性安隱說名爲善巧便
所攝者顯道諦能招愛果者顯苦集諦少分自性安
隱者顯滅諦若法不巧便攝招不愛果性不安隱說
名不善此則顯示苦集諦少分與二相違說名無記
有說若法能得愛果及樂受果說名爲善若法能得

論
不愛果及苦受果說名不善與二相違說名無記有
說若法能生愛有芽及解脫芽說名爲善若法能生
不愛有芽說名不善與二相違說名無記有說若法
能感可愛趣說名爲善若法能感不可愛趣說名不
善與二相違說名無記有說若法墮還滅品清淨品
是輕舉性說名爲善若法墮流轉品雜染品是沉重
性說名不善與二相違說名無記氣尊者曰由四緣
故說名爲善一自性故二相應故三等起故四勝義
故自性善者有說是慚愧有說是三善根相應善者
是彼相應心所法等起善者是彼所起身語業心

不相應行勝義善者謂涅槃安隱故名善分別論者
作如是言自性善者謂智相應善者謂彼相應識等
起善者謂彼所起身語業勝義善者謂涅槃由四緣
故說名不善一自性故二相應故三等起故四勝義
故自性不善者有說是無慚無愧以一向不善徧不
善心故有說是三不善根以具五義故相應不善者
謂彼相應心所法等起不善者謂彼所起身語業
心不相應行勝義不善者謂生死不安隱故名不善
分別論者作如是言自性不善者謂癡相應不善者
謂彼相應識等起不善者謂彼所起身語業勝義不

善者謂生死脅尊者言若法是如理作意自性如理作意相應如理作意等起如理作意等流果離繫果者是善若法是不如理作意自性不如理作意相應不如理作意等起不如理作意等流果者是不善與二相違是無記如如理作意不如理作意慚愧無慚無愧三善根三不善根信等五根五蓋亦爾集異門說何故名善答有可愛果可樂果適意果悅意果可欣尚果名善此說等流果復次有可愛異熟可樂異熟適意異熟悅意異熟可欣尚異熟名善此說異熟果與此相違是不善與二相違是無記餘義如結蘊

初納息廣說此二十二根幾有異熟乃至廣說問何故作此論答欲止他宗顯已義故謂譬喻者說離思無異熟因離受無異熟果爲遮彼說顯異熟因及異熟果俱通五蘊飲光部說諸異熟因異熟未生彼因有體異熟生已彼因便失如芽未生種猶有體芽既生已種體便無欲止彼意顯因恒有復有外道執善惡業無果異熟亦遮彼意顯善惡業有果異熟故作斯論此二十二根幾有異熟幾無異熟答一有異熟十一無異熟十應分別一有異熟者謂憂根十一無異熟者謂七色命三無漏根十應分別者謂意四受

信等五根此復云何謂意根或有異熟或無異熟云何有異熟謂不善善有漏意根云何無異熟謂無記無漏意根如意根樂根喜根捨根亦爾苦根或有異熟或無異熟云何有異熟謂善不善苦根云何無異熟謂無記苦根信等五根或有異熟或無異熟云何有異熟謂有漏信等五根云何無異熟謂無漏信等五根已分別諸根有異熟等彼有異熟等義今當說問云何名有異熟等爲與自異熟俱故名有異熟爲與他異熟俱故名有異熟耶若與自異熟俱故名有異熟者如何因果不並又違伽他所說如說作惡不卽熟等若與他異熟俱故名有異熟者則無漏道應名有異熟與他異熟俱故答應說與自異熟俱故名有異熟問如何因果不並及違伽他說耶答有二種俱一者有俱二者並俱有俱者如有因有果有所緣有異熟等並俱者如有尋有伺有喜有作意等此中依有俱而作論如有俱並俱有俱不相離俱亦爾有說有三種俱一者遠俱二者近俱三遠近俱前二如前遠近俱者如有漏有隨眠有緣有事等此中但依遠俱作論問何故名異熟答異類而熟故名異熟熟有二種一同類二異類同類者謂等流果異類熟者

謂異熟果餘如結蘊廣說此二十二根幾見所斷乃至廣說問何故作此論答欲止他宗顯已義故如譬喻者說無有世俗道能斷煩惱彼大德說異生無有斷隨眠者但能伏纏亦非世俗道有永斷義由契經言聖慧見已方能斷故爲遮彼說顯世俗道亦能永斷諸異生類亦斷隨眠故契經說盟達洛伽曷邏摩子斷欲斷色乃至斷於無所有處生於非想非非想處又說有外道仙能離欲染如是等所言聖慧見已方能斷者顯能究竟斷有頂染或有說言諸世俗道雖能永斷但是異生而非聖者非捨勝道用劣道故

爲止彼意顯諸聖者亦以世俗道離八地染有作是說頓斷非漸金剛喻定現在前時一切煩惱一時斷故爲遮彼執顯必漸斷四沙門果漸次得故有執現觀惟頓非漸爲遮彼說顯漸非頓又爲顯示有二部結二部對治故作斯論此二十二根幾見所斷幾修所斷幾不斷答九修所斷三不斷十應分別九修所斷者謂七色命苦根三不斷者謂三無漏根十應分別者謂意四受信等五根謂意根或見所斷或修所斷或不斷云何見所斷謂意根隨信隨法行現觀邊忍所斷此復云何謂見所斷八十八隨眠相應意根

二何修所斷謂意根學見跡修所斷此復云何謂修
所斷十隨眠相應意根及不染汙有漏意根云何不
斷謂無漏意根如意根捨根亦爾樂根或見所斷或
修所斷或不斷云何見所斷謂樂根隨信隨法行現
觀邊忍所斷此復云何謂見所斷二十八隨眠相應
樂根卽第三靜慮見所斷云何修所斷謂樂根學見
跡修所斷此復云何謂修所斷五隨眠相應樂根及
不染汙有漏樂根五隨眠者謂欲界貪無明色界貪
慢無明云何不斷謂無漏樂根喜根或見所斷或修
所斷或不斷云何見所斷謂喜根隨信隨法行現觀

邊忍所斷此復云何謂見所斷五十二隨眠相應喜
根五十二隨眠者謂欲界二十四除瞋癡八色界二
十八云何修所斷謂喜根學見跡修所斷此復云何
謂修所斷六隨眠相應喜根及不染汙有漏喜根六
隨眠者謂欲色界貪慢無明云何不斷謂無漏喜根
憂根或見所斷或修所斷云何見所斷謂憂根隨信
隨法行現觀邊忍所斷此復云何謂見所斷十六隨
眠相應憂根十六隨眠者謂欲界邪見瞋癡無明各
四云何修所斷謂憂根學見跡修所斷此復云何謂
修所斷二隨眠相應憂根及不染汙憂根二隨眠者

謂欲界瞋無明信等五根或修所斷或不斷云何修
所斷謂有漏信等五根云何不斷謂無漏信等五根
已分別諸根見斷等彼見斷等義今當說問云何名
見所斷修所斷耶如見不離修修不離見見道中如
實修可得修道中如實見可得慧名爲見不放棄名
修此中說何名爲如實此中意說偏多猛利名爲如
實謂見道中慧多不放棄少修道中不放棄多慧少
或復此中意說平等名爲如實謂見道中隨有爾所
慧卽有爾所不放棄修道中隨有爾所不放棄卽有
爾所慧尊者世友作如是說觀四聖諦斷諸煩惱云

何分別此是見所斷此是修所斷答由見而斷由見
而除由見變吐名見所斷有說見所斷亦應言修所
斷以見道中如實修可得故如是說者由見而斷由
見而除由見變吐名見所斷如所得道若習若修若
多修習分齊斷限量斷漸令薄究竟斷名修所斷有
說修所斷亦應言見所斷以修道中如實見可得故
如是說者如所得道若習若修若多修習分齊斷限
量斷漸令薄究竟斷名修所斷問此言有何義答此
說見道是猛利道暫現在前九品煩惱一時而斷修
道是不猛利道數習現前九品煩惱九時而斷如利

鈍刀俱截一物利者一割便斷鈍者數割乃斷有說
若法以見增道斷名見所斷若法以修增道斷名修
所斷有說若法以二相道斷名見所斷二相者謂見
相慧相若法以三相道斷名修所斷三相者謂見智
慧相有說若法以四相道斷名見所斷四相者謂眼
明覺慧相若法以五相道斷名修所斷五相者謂眼
智明覺慧相有說若法由忍斷名見所斷若法由智
斷名修所斷餘廣說如結蘊初納息

阿毗達磨大毗婆沙論卷第一百四十四

說一切有部發智

音釋

脇虛業切

佉丘迎切

補特伽羅

梵語也此云數取趣伽末加切

感舍歷切憂

也秦辭切

倂秦辭切

伽他

梵語也此云孤起又云頌伽末加切他唐和切

分齊符分

問切齊才詣切分齊限量也

浮渡居士吳用先施資刻此
阿毗達磨大毗婆沙論第一百四十四卷計
字七千一百三十該銀三兩五錢六分五厘
新安釋如淨對上元陶邦本書句容潘繼德刻
萬曆丙辰歲夏四月徑山化城謹

阿毗達磨大毗婆沙論卷第一百四十五

五百大阿羅漢等造

唐三藏法師玄奘奉詔譯

根蘊第六中根納息第一之四

此二十二根幾見苦所斷乃至廣說問何故復作此論答前門遮說頓斷者意而猶未遮說頓現觀又亦未顯漸次現觀今欲遮顯故作斯論有說前門亦遮頓現觀亦顯漸現觀但不明了今欲令明了故作斯論有說所以作論者欲分別五部煩惱五部對治故造斯論五部煩惱者謂見苦所斷乃至修所斷五部

對治者謂苦忍苦智乃至道忍道智此二十二根幾
有苦所斷幾見集所斷幾見滅所斷幾見道所斷幾
修所斷幾不斷答九修所斷三不斷十應分別九修
所斷者謂七色命苦根三不斷者謂三無漏根十應
分別者謂意四受信等五根謂意根或見苦所斷或
見集見滅見道所斷或修所斷或不斷云何見苦所
斷謂意根隨信隨法行苦現觀邊忍所斷此復云何
謂見苦所斷二十八隨眠相應意根云何見集所斷
謂意根隨信隨法行集現觀邊忍所斷此復云何謂
見集所斷十九隨眠相應意根云何見滅所斷謂意

根隨信隨法行滅現觀邊忍所斷此復云何謂見滅
所斷十九隨眠相應意根云何見道所斷謂意根隨
信隨法行道現觀邊忍所斷此復云何謂見道所斷
二十二隨眠相應意根云何修所斷謂意根學見跡
修所斷此復云何謂修所斷十隨眠相應意根及不
染汙有漏意根云何不斷謂無漏意根如意根捨根
亦爾樂根或見苦所斷或見集見滅見道所斷或修
所斷或不斷云何見苦所斷謂樂根隨信隨法行苦
現觀邊忍所斷此復云何謂見苦所斷九隨眠相應
樂根云何見集所斷謂樂根隨信隨法行集現觀邊

忍所斷此復云何謂見集所斷六隨眠相應樂根云何見滅所斷謂樂根隨信隨法行滅現觀邊忍所斷此復云何謂見滅所斷六隨眠相應樂根云何見道所斷謂樂根隨信隨法行道現觀邊忍所斷此復云何謂見道所斷七隨眠相應樂根云何修所斷謂樂根學見跡修所斷此復云何謂修所斷五隨眠相應樂根及不染汙有漏樂根五隨眠者謂欲界貪無明色界貪慢無明云何不斷謂無漏樂根喜根或見苦所斷或見集見滅見道所斷或修所斷或不斷云何見苦所斷謂喜根隨信隨法行苦現觀邊忍所斷此

復云何謂見苦所斷十七隨眠相應喜根十七隨眠者謂欲界除瞋疑色界一切云何見集所斷謂喜根隨信隨法行集現觀邊忍所斷此復云何謂見集所斷十一隨眠相應喜根云何見滅所斷謂喜根隨信隨法行滅現觀邊忍所斷此復云何謂見滅所斷十一隨眠相應喜根云何見道所斷謂喜根隨信隨法行道現觀邊忍所斷此復云何謂見道所斷十三隨眠相應喜根云何修所斷謂喜根學見跡修所斷此復云何謂修所斷六隨眠相應喜根及不染汙有漏喜根六隨眠者謂欲界除瞋色界一切云何不不斷謂

無漏喜根憂根或見苦所斷或見集見滅見道所斷
或修所斷云何見苦所斷謂憂根隨信隨法行苦現
觀邊忍所斷此復云何謂見苦所斷四隨眠相應憂
根四隨眠者謂欲界邪見瞋癡無明云何見集所斷
謂憂根隨信隨法行集現觀邊忍所斷此復云何謂
見集所斷四隨眠相應憂根云何見滅所斷謂憂根
隨信隨法行滅現觀邊忍所斷此復云何謂見滅所
斷四隨眠相應憂根云何見道所斷謂憂根隨信隨
法行道現觀邊忍所斷此復云何謂見道所斷四隨
眠相應憂根云何修所斷謂憂根學見跡修所斷此

復云何謂修所斷二隨眠相應憂根及不染汗憂根
二隨眠者謂欲界瞋無明信等五根或修所斷或不
斷云何修所斷謂有漏信等五根云何不斷謂無漏
信等五根已分別諸根見苦所斷等彼見苦所斷等
義今當說問云何名見苦所斷乃至修所斷耶答若
法對治決定對治所緣決定名見苦所斷乃至見道
所斷若法對治不決定對治所緣不決定名修所斷
有說若法處所決定對治所緣決定名見苦所斷乃
至見道所斷若法處所不決定對治所緣不決定名
修所斷有說若法苦忍苦智爲對治名見苦所斷乃

至若法道忍道智爲對治名見道所斷若法諸智爲對治名修所斷有說若法苦忍所斷名見苦所斷乃至若法道忍所斷名見道所斷若法諸智所斷名修所斷有說若法觀苦諦所斷名見苦所斷乃至若法觀道諦所斷名見道所斷若法或觀苦諦或觀集滅道諦或不觀諦所斷名修所斷有說若法與見苦諦相違名見苦所斷乃至若法與見道諦相違名見道所斷若法與見四諦相違名修所斷此二十二根幾見幾非見乃至廣說問何故作此論答欲止說一切法皆是見性者意彼作是說所作猛利說名爲見一

切法無不皆於自事猛利故悉名見爲遮彼執顯諸法中惟眼根及慧少分名見非餘故作斯論此二十二根幾見幾非見答一見十七非見四應分別一見者謂眼根十七非見者謂六色命意五受信等四根四應分別者謂慧三無漏根慧根或見或非見云何見謂盡智無生智所不攝意識相應慧根云何非見謂餘慧根卽五識相應慧根及盡智無生智所攝慧根未知當知根或見或非見云何見謂未知當知根所攝慧根云何非見謂未知當知根所攝餘根卽餘八根如未知當知根已知根亦爾具知根或見或非

見云何見謂盡智無生智所不攝具知根所攝慧根云何非見謂具知根所攝餘根卽餘八根及盡智無生智所攝慧根已分別諸根見等彼見等義今當說問何故名見見是何義答由四緣故名見一能觀故二推決故三堅執故四深入所緣故能觀故者謂見自性問邪見顛倒見彼何所觀答是故說見自性謂雖邪顛倒見而是見慧自性故說能觀知人隨有所見卽名能觀非如盲者推決故者謂能推求決定問一剎那頃如何推求答性猛利故說名推求堅執故者謂諸見趣僻執堅牢非聖道力無由令捨深入所

緣者謂於境猛入如鍼墮泥有說由二緣故名見一照了性故二推度性故有說由三緣故名見一有見相故二成見事故三於境無礙故有說由三緣故名見一意樂故二執著故三推決故有說由三緣故名見一意樂故二加行故三無智故意樂故者謂意樂壞者加行故者謂加行壞者無智故者謂俱壞者復次意樂故者謂修定者加行故者謂尋思者無智故者謂隨聞者此二十二根幾有尋有伺乃至廣說問何故作此論答欲止譬喻者所說故彼說從欲界乃至有頂皆有尋伺所以者何契經說故如契經說心

麤性是尋心細性是伺心麤細性乃至有頂彼大德
說曰對法諸師說尋伺是心麤細性此麤細性相待
而立乃至行頂皆現可得而說尋伺惟在欲界及梵
世有此是惡說非爲善說阿毗達磨諸論師言我等
善說非爲惡說以依多門說麤細性非是一種如說
纏麤隨眠細此中尋伺非麤非細以俱非纏隨眠性
故如說色蘊麤四蘊細此中尋伺俱是其細以俱攝
在行蘊中故如說欲界麤初靜慮細此中尋伺俱通
麤細以二俱通二地攝故如說初靜慮麤第二靜慮
細此中尋伺俱是其麤以依多門說麤細性故尋與

伺非至有頂若說尋伺至有頂者應不說有三地差
別譬喻者言始從欲界乃至有頂皆有善染無記三
法一切地染法皆各有尋有伺惟善無記有三地別
若爾何故說尋伺滅無尋無伺定生喜樂入第二靜
慮彼言此依善尋伺說不說染汙此說不然何緣乃
說滅善尋伺非滅染汙而應先滅染汙尋伺以離染
時必斷彼故以欲界地方捨於善故譬喻者真爲惡
說欲止彼意顯尋與伺惟在二地故作斯論此二十
二根幾有尋有伺幾無尋惟伺幾無尋無伺答二有
尋有伺八無尋無伺十二應分別二有尋有伺者謂

苦憂根八無尋無伺者謂七色命根十二應分別者
謂意三受信等五三無漏根意根或有尋有伺或無
尋惟伺或無尋無伺云何有尋有伺謂有尋有伺作
意相應意根此復云何謂欲界初靜慮意根云何無
尋惟伺謂無尋惟伺作意相應意根此復云何謂靜
慮中間意根云何無尋無伺謂無尋無伺作意相應
意根此復云何謂從第二靜慮乃至非想非非想處
意根如意根捨根信等五根三無漏根亦爾樂根或
有尋有伺或無尋無伺云何有尋有伺謂有尋有伺
作意相應樂根此復云何謂欲界初靜慮樂根云何

無尋無伺謂無尋無伺作意相應樂根此復云何謂
第二靜慮樂根如樂根喜根亦爾然有差別謂第二
靜慮喜根名無尋無伺已分別諸根有尋有伺等彼
有尋有伺等義今當說問云何名有尋有伺無尋惟
伺無尋無伺耶答若法與尋伺俱尋伺相應尋伺等
起尋伺俱轉名有尋有伺若法不與尋俱惟與伺俱
尋不相應惟伺相應非尋等起惟伺等起尋已息滅
惟伺俱轉名無尋惟伺若法不與尋伺俱非尋伺相
應非尋伺等起尋伺已息名無尋無伺有說若法有
尋求有伺察名有尋有伺若法無尋求有伺察名無

尋惟何若法無尋求無伺察名無尋無伺此二十二
根幾樂根相應乃至廣說問何故作此論答欲止他
宗顯已義故如譬喻者說心心所法次第而生彼大
德言心心所法一一而起如經狹路尚無二並何況
有多或復有說若法由彼力起卽說與彼相應非餘
謂心能生心及心所故心心所與心相應心所惟能
生於心所故諸心所亦互相應心所不能生於心故
不說心與心所相應或復有執諸法惟與自體相應
彼作是言徧和合義是相應義更無餘徧和合如自
體於自體者故說自體相應非他有執諸法自體於

自體非相應非不相應非相應者不自觀故非不相
應者徧和合故爲止如是種種異說顯心心所俱時
而生展轉相應非於自體惟望他說故作斯論此二
十二根幾樂根相應幾苦根相應幾喜根相應幾憂
根相應幾捨根相應答樂根喜根捨根九根少分相
應苦根憂根六根少分相應樂喜捨根九根少分相
應者謂意信等五根三無漏根問云何樂喜捨與此
九少分相應耶答意根信等五根通與五受相應此
中但取三受相應故言少分三無漏根多法爲性今
除受體與餘相應故言少分苦根憂根六根少分相

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

論

丁卯年...

...

...

應者謂意信等五根問云何苦憂與此六少分相應耶答此六根與五受相應此中但取憂苦相應故言少分問何故但問與受相應不問餘心心所耶答是作論者意欲爾故隨彼意欲而作論但不違法相便不應責有說一切法皆歸趣受是以問之有說一受有多根相謂於一受分為五根餘法不爾故惟問受有說諸受成就就不相違現行相違是以偏問成就就不相違者謂一有情成就五受現行相違者謂一有情一剎那中不能起二何況起多有說以受是緣起輪轂是以偏問有說除受更欲問何若問信等五根三

無漏根彼惟是善非與一切有相應義若問命等八根彼惟無記又不相應問若爾何故不問意根答本由意根立相應法不可還問與意相應是故此中惟問與受相應之義五受自性非自相應故復惟以餘法問受已分別諸根與受相應彼相應義今當說問何故名相應相應是何義答等義是相應義問諸心品中心所法有多有少云何名等謂欲界多色界少色界多無色界少善多不善少不善多無記少有覆無記多無覆無記少云何等義是相應義答以事等故說名爲等謂一心品中若有二受一想等者可說

論

北...

...

...

非等然一心品中如受有一想等亦爾故名爲等有說五種等義是相應義謂所依等所緣等行相等時等事等餘廣說如結蘊初納息此二十二根幾欲界繫乃至廣說問何故作此論答欲止他宗顯已義故謂或有執色界有男女根彼作是言有色身處皆有男女二根可得爲止彼意顯女男根惟欲界有故作斯論復有說言樂根苦根五地可得謂欲界四靜慮彼說有身皆有苦樂爲遮彼執顯苦根惟欲界有樂根惟三地有故作斯論或復有說喜根憂根九地可得謂從欲界乃至有頂彼說有心皆有憂喜三界九

地皆有心故又欲界身不淨可厭尚於合時生喜離時生憂況上界中身極淨妙猶如燈燄心無燒濁如清涼池而於離合得無憂喜爲遮彼執顯憂惟欲界喜至第二靜慮上地俱無故作斯論此二十二根幾欲界繫幾色界繫幾無色界繫幾不繫答四欲界繫三不繫十五應分別四欲界繫者謂女男苦憂根三不繫者謂三無漏根十五應分別者謂五色命意三受信等五根眼根或欲界繫或色界繫云何欲界繫謂欲界繫大種所造眼根云何色界繫謂色界繫大種所造眼根如眼根耳鼻舌身根亦爾命根或欲界

論
北婆羅門論卷一百四十五
七
准五

繫或色界繫或無色界繫云何欲界繫謂欲界繫壽
二何色界繫謂色界繫壽云何無色界繫謂無色界
繫壽意根或欲界繫或色界繫或無色界繫或不繫
云何欲界繫謂欲界繫作意相應意根云何色界繫
謂色界繫作意相應意根云何無色界繫謂無色界
繫作意相應意根云何不繫謂無漏作意相應意根
如意根捨根信等五根亦爾樂根或欲界繫或色界
繫或不繫云何欲界繫謂欲界繫作意相應樂根云
何色界繫謂色界繫作意相應樂根云何不繫謂無
漏作意相應樂根如樂根喜根亦爾問何故色界無

男女根答非其田非其器乃至廣說有說爲欲棄捨
男女根故修諸靜慮往色界生若彼亦有男女根者
則應無有求生彼界若法下地所有上地亦有者應
不施設有漸次滅法若無漸次滅法亦應無畢竟滅
法以漸以滅法能引畢竟滅法故若無畢竟滅法應
無解脫若無解脫應無出離勿有如斯衆多過失故
於色界無男女根有說男女二根段食所引如契經
說劫初時人無男女根形相不異後食地味女男根
生由此便有男女相異色界離段食故無此二根有
說男女二根欲界有用非於色界是故彼無問鼻舌

二根於彼無用云何得有答鼻舌二根於彼有用令
 端嚴故非男女根有端嚴義可慚鄙故問色界天衆
 爲女爲男設爾所失若是女者應有女根若是男者
 應有男根若非二者便違經說如說女身不得作梵
 王等而不遮男答應作是說彼皆是男問豈不彼類
 不成就男根耶答雖無男根而有餘丈夫相又能離
 染故說爲男如契經中說諸果向皆名丈夫非無女
 人行向往果當知亦以能離染故說爲丈夫毗柰耶
 中亦作是說佛以兩手捧大生主骨告苾芻衆汝等
 諦聽一切女人其性輕轉多諸嫉妬諂媚慳貪惟大

生主雖是女人而離一切女人過失作丈夫所作得
 丈夫所得我說是輩名爲丈夫色界諸天理亦應爾
 能離染故說爲丈夫由此應作四句分別有是男子
 不成就男根謂色無色天大生主等有成就男根而
 非男子謂二形者有是男子亦成就男根謂一切丈
 夫成就男根者有非男子亦不成就男根謂除前相
 諸是女者必成就女根有成就女根而非是女謂二
 形者若依所引毗柰耶義女亦四句應推廣說問何
 故上界無憂苦根答非田非器乃至廣說有說爲欲
 棄捨憂苦根故修諸靜慮往色界生若彼亦有憂苦

根者則應無有求生彼界若法下地所有上地亦有者應不施設有漸次滅法廣說如前勿有斯過故上界無憂苦根有說何故憂苦根色界無者以是欲界不共過失故諸界地中各有不共功德過失欲界過失者謂苦根等功德者謂能入見道等上界功德過失隨地應廣說有說欲界是過失界由是過失界故雖殊勝身亦猶有苦如佛獨覺聲聞輪王上界是功德界由是功德界故雖下劣身亦無有苦如遇惡歲雖有美稼不能無災若逢善歲雖諸穢莫亦無災及欲界上界應知亦爾所以上界亦無憂者以諸憂根

離欲捨故又是重無知等流果故生上界者離重無知是故憂根於彼非有已分別諸根欲界繫等彼欲界繫等義今當說問云何名欲界繫色界繫無色界繫耶答若法繫在欲界名欲界繫繫在色界名色界繫繫在無色界名無色界繫如牛繫在柱等名柱等繫或有說者若法繫屬欲界足名欲界繫繫屬色無色界足名色無色界繫足名煩惱如說佛無邊所行無足誰將去如人有足能往四方若無足者則不能往如是若有煩惱足者能往諸界諸趣諸生死流轉無煩惱足則不能往或有說者若法爲欲界生死

縛所繫名欲界繫爲色無色界生死縛所繫名色無色界繫或有說者若法爲欲界阿賴耶所藏摩摩异多所執名欲界繫爲色無色界阿賴耶所藏摩摩异多所執名色無色界繫阿賴耶者謂愛摩摩异多者謂見或有說者若法爲欲界愛所潤見執爲我我所名欲界繫爲色無色界愛所潤見執爲我我所名色無色界繫或有說者若法欲界樂欲所合名欲界繫爲見或有說者若法爲欲界垢所垢毒所毒穢所穢名欲界繫爲色無色界垢所垢毒所毒穢所穢名色

無色界繫此中一切煩惱名穢非但說瞋

阿毗達磨大毗婆沙論卷第一百四十五

說一切有部發智

音釋

狹轄甲切

燒而沼切

諂媚諂丑琰切

异羊

切隘也

擾也

明秘切

惑也



淨渡居士吳用先施資刻此
阿毗達磨大毗婆沙論卷第一百四十五
字五千九百十該銀二兩九錢五分五厘
新安釋如淨對上元陶那本書陳水楊萬初刻
萬曆丙辰歲夏四月徑山化城識

9
170
1
2
3
4
5
6
7
8
9
180
1
2
3
4
5
6
7
8
9
190
1
2
3
4
5
6
7
8
9

言

大明海防論卷一百四十五

主

海防論卷一百四十五
大明海防論卷一百四十五

大

卷一百四十五

大明海防論卷一百四十五
大明海防論卷一百四十五
大明海防論卷一百四十五

三

大田義之助卷一四四五

十五

